

08 AUG 2002
PETRONAS-NATUNA/I
PETRONAS TERIMA GAS PERTAMA DARI NATUNA BARAT

KUALA LUMPUR, 8 Ogos (Bernama) -- Petronas hari ini menerima penyerahan pertama gas asli dari Natuna Barat, Indonesia, yang menandakan satu sejarah penting dalam perhubungan di antara Malaysia dan Indonesia.

Di dalam satu kenyataan di sini hari ini, Petronas berkata peristiwa itu juga menyaksikan pengukuhan perhubungan antara Petronas dan perbadanan minyak Indonesia, Pertamina.

Di bawah perjanjian jualan gas yang ditanda tangani antara Petronas dan Pertamina pada Mac 2001, Pertamina akan membekal sehingga 250 juta kaki padu standard (SCF) gas sehari bagi tempoh selama 20 tahun.

Gas asli itu dari Natuna Barat akan dihantar melalui talian paip sejauh 100km, berukuran 18 inci dari pelantar pengeluaran luar pantai boleh bergerak Hang Tuah di perairan Indonesia ke pelantar gas Duyong di luar pantai Semenanjung Malaysia.

"Loji Hang Tuah itu dikendalikan oleh Conoco Indonesia Inc Ltd, manakala pelantar Duyong dikendalikan oleh Petronas Carigali Sdn Bhd, sebuah anak syarikat Petronas," kata syarikat itu.

Petronas berkata talian paip 100km itu adalah komponen terbaru prasarana gas melalui perhubungan lintas sempadan yang sedang berkembang di ASEAN dan merakam satu lagi langkah penting ke arah merealisasikan rangkaian Talian paip Gas Trans-ASEAN.

"Rantaian kepada dan perhubungan antara prasarana sedia ada dan akan datang dalam kawasan-kawasan kaya gas di ASEAN akan membantu menjamin bekalan gas bagi menampung keperluan tenaga yang kian meningkat di rantau ini," katanya.

Peristiwa bersejarah itu disaksikan oleh Perdana Menteri Datuk Seri Dr Mahathir Mohamad dan Presiden Indonesia Megawati Soekarnoputri. -- BERNAMA

NN KTC OS